



LÖG; BERG FÉLAG STJÓRNENDA

I. kafli. Heiti félagsins, starfssvið, tilgangur og félagsmenn.

1. grein.

Félagið heitir BERG félag stjórnenda.

Heimili þess og varnarþing er á Akureyri. Starfssvæði þess er á Norðurlandi eystra, í Eyjafjarðar- og Þingeyjarsýslu, frá Ólafsfirði í vestri til Þórshafnar í austri.

Félagið starfar innan vébanda Sambands Stjórnendafélaga, STF og lýtur lögum þess og fyrirmælum.

2. grein.

Tilgangur félagsins er:

- Að starfa sem skipulagsbundið stéttarfélag stjórnenda á félagssvæðinu, án stjórn málaafskipta.
- Að gæta hagsmuna félagsmanna varðandi atvinnuskilyrði, launakjör og réttindi.
- Að vinna að aukinni menntun, verkþæfni og framförum meðal félagsmanna, styrkja þá til menntunar og stuðla að auknum möguleikum þeirra að nýta sér það námsefni sem í boði er.
- Að vinna að orlofsmálum félagsmanna með það markmið að auka möguleika þeirra til að njóta orlofs.
- Aðstoða félagsmenn í atvinnuleit og veikindum.

3. grein.

Félagar geta þeir einir verið:

- Sem starfa sem stjórnendur eða gegna öðrum ábyrgðarstöðum og eru viðurkenndir sem slíkir af vinnuveitanda sínum.
- Stjórnendur sem látið hafa af störfum vegna aldurs eða veikinda.

4. grein.

Inntökubeiðni í félagið sé á sérstöku eyðublaði og skal það afhent eða sent til stjórnar félagsins eða skrifstofu STF. Tekur það þegar gildi ef það samrýmist lögum félagsins og STF að mati stjórnar.

5. grein.

Grunn félagsgjaldi má ekki breyta nema á aðalfundi, gjaldið skal ákvarðast sem prósentu af öllu kaupi sem nú er 0,70 % . Félagsmenn sem hafa ekki lengur bætur úr sjúkrasjóði vegna sjúkdóms eða slysa, skulu vera gjaldfríir þar til þeir hefja störf að nýju. Gjaldfríðindi skerða ekki félagsréttindi.

Félagsmenn á eftirlaunum eru gjaldfríir. Stjórn félagsins hefur heimild til að fella út af félagsskrá hvern þann sem ekki hefur greitt áskilin félagsgjöld í eitt ár.

II. kafli. Réttindi, skyldur, réttindamissir og brottvikning

6. grein.

Réttindi félagsmanna eru málfrelsi, tillöguréttur og atkvæðisréttur skv. almennum fundarsköpum.

7. grein.

Skyldur félagsmanna eru:

- Að hlýða fyrirætlum félagsins, lögum þess, reglugerðum og samningum í öllum greinum.
- Að gegna trúnaðarstörfum fyrir félagið.
- Að fylgjast með að áskilin gjöld séu greidd til félagsins.
- Að halda öllu sem gerist á fundum félagsins stranglega innan vébanda þess, ef stjórn æskir þess.
- Verði félagsmaður uppvís að vinna gegn stefnu félagsins getur það varðað brottvikningu.

8. grein.

Þegar einhver félagsmaður hefur gengt sama trúnaðarstarfi fyrir félagið tvö kjörtímabil, þá getur hann skorast undan endurkjöri til þess starfs í jafn langan tíma.

9. grein.

Ef ágreiningur verður á milli atvinnurekenda og félagsmanns um atvinnumál, getur viðkomandi félagsmaður lagt málið fyrir stjórn félagsins, skal stjórn eða sáttanefnd þá þegar athuga málið og reyna að miðla málum, á þann hátt að félagsmaðurinn tapi ekki vinnunni. Ef lausn næst ekki skal stjórnin vísa því til STF til úrlausnar.

10. grein.

Félagsmönnum er óheimilt að ganga inn á verksvið hvers annars á einn eða annan hátt og ekki má bjóða hvorn annan frá verki með lægri launaboðum.

11. grein.

Félagsmenn eru algjörlega hlutlausir í öllum kaupdeilum milli vinnuveitenda og undirmanna sinna, hvort sem um er að ræða verkföll eða verkbönn. Skyld er hverjum félagsmanni að gæta þeirra verðmæta sem hann hefur umsjón með og verja þau skemmdum eftir eigin getu, ákvæði þessarar greinar skerðir ekki verkfallsrétt stjórnanda.

III. kafli. Stjórn félagsins og störf hennar.

12. grein.

Aðalstjórn félagsins er skipuð fimm mönnum og þremur til vara, formanni, varaformanni, ritara, gjaldkera og meðstjórnanda. Skulu þeir kosnir á aðalfundi, hver fyrir sig. Meðstjórnandi er varamaður ritara, gjaldkera og varaformanns. Kjörtímabil aðalstjórnar er tvö ár, þ.a. annað árið er kosið um formann, ritara og tvo varamenn, en hitt árið um varaformann, gjaldkera, meðstjórnanda og einn varamann. Einnig skulu kosnir á sama hátt tveir skoðunarmenn reikninga til tveggja ára og tveir til vara.

Í orlofsheimilanefnd skal kjósa fjóra menn til tveggja ára í senn, tvo á hverjum aðalfundi. Orlofsheimilanefnd kys sér formann úr eigin röðum.

Kosning skal vera skrifleg ef óskað er.

Bráðabirgðaákvæði 2018: Á aðalfundi 2018 skal kosið um formann, ritara og tvo varamenn til eins árs, en varaformann, gjaldkera, meðstjórnanda og einn varamann til tveggja ára skv. lögum þessum.

13. grein.

Formaður félagsins er forseti stjórnar og jafnframt framkvæmdastjóri félagsins. Hann hefur eftirlit með því að þeir sem kosnir hafa verið til trúnaðarstarfa fyrir félagið gegni skildum sínum við það. Formaður boðar til funda og stýrir þeim.

14. grein.

Ritari heldur gjörðabók og skrásetur í hana stuttorðar og hlutlausar skýrslur um það sem fer fram á fundum félagsins. Viðstaddir fundarmenn undirrita bókunina. Ritari ásamt formanni annast bréfaskriftir fyrir stjórnina og birta félagsmönnum bréf og tilkynningar.

15. grein.

Gjaldkeri heldur félagaskrá, hann innheimtir öll áskilin gjöld til félagsins, og greiðir öll tilskilin útgjöld félagsins, eftir ávísun formanns. Hann setur upp ársreikninga og skal afhenda þá skoðunarmönnum félagsins minnst tveimur vikum fyrir aðalfund.

Stjórnin varðveitir eignir félagsins og ávaxtar þær. Reikningsár félagsins er almanaksárið.

16. grein.

Stjórn félagsins fer með æðsta vald í öllum málefnum félagsins milli aðalfunda. Hún setur sér starfsreglur sem bornar skulu upp á aðalfundi til samþykktar. Allar styrkveitingar skulu samþykktar af stjórn. Milli stjórnarfunda er heimilt að ákvarðanataka stjórnar sé með rekjanlegum rafrænum hætti. Slíkar samþykktir skulu síðan formlega staðfestar á næsta stjórnarfund. Stjórn félagsins hefur fullt umboð til að kaupa og selja fasteignir, þ.m.t. sumarhús í eigu félagsins og fulla heimild til veðsetningar á eignum félagsins. Ávallt skal meirihluti stjórnar skrifa undir kaup, sölu eða veðsetningar á eignum félagsins.

Stjórn félagsins skal sjá um rekstur á fasteignum félagsins.

17. grein.

Stjórn félagsins er skylt að leggja öll mikilvæg stórmál fyrir félagsfund, svo sem mál er varðar samninga við önnur félög eða einstaklinga, og einnig ef um þýðingarmikil atvinnumál er að ræða.

IV. kafli. Fundarhöld og fleira.

18. grein.

Aðalfund skal halda á tímabilinu febrúar til júní ár hvert. Hann er löglegur ef stjórn félagsins boðar til hans með minnst sjö daga fyrirvara. Heimilt er að fundarboð sé með rafrænum hætti. Takist ekki að ljúka aðalfundarstörfum skal boða til framhaldsaðalfundar á sama hátt og fyrr segir, innan þriggja vikna.

19. grein.

Á aðalfundi skal kjósa fundastjóra úr hópi fundarmanna, hann stýrir umræðum og kosningum samkvæmt fyrirbyggjandi dagskrá, hann undirritar fundagerðir ásamt ritara. Almenn fundarsköp gilda á fundum félagsins nema annað verði ákveðið með sérstakri reglugerð.

20. grein.

Meðal dagskrárliða á aðalfundum skal stjórnin gera grein fyrir starfi stjórnarinnar á síðasta reikningsári og leggja fram endurskoðaða reikninga fyrir alla sjóði félagsins.

Fastanefndir skila skýrslum um störf sín.

Á aðalfundi skal árlega kjósa einn mann og varamann í hans stað úr stjórn félagsins til setu í stjórn STF.

Sé fyrirhuguð lagabreyting skal þess getið í fundarboði ásamt öðrum fundarefnum.

Lagabreytingar eru einungis afgreiddar á aðalfundi.

21. grein.

Fundi skal halda svo oft sem stjórninni þykir ástæða til, eða þegar minnst 20 félagar æskja þess skriflega og tilgreina fundarefnið, ber þá stjórninni að boða til fundar innan þriggja vikna frá því að óskinn berst. Sömu reglur gilda um fundarboð sem á aðalfundi.

22. grein.

Stjórnarfundir skulu haldnir reglulega, minnst sex sinnum á milli aðalfunda. Formaður skal ávallt leggja fram ákveðna dagskrá og málin rædd og afgreidd skipulega samkvæmt henni.

V. kafli. Gjaldheimta, niðurlagsákvæði og fleira.

23. grein.

Félagsgjöld ber að greiða mánaðarlega. Félagsmönnum ber að fylgjast með því hvort vinnuveitendur þeirra uppfylli skyldu sína í þessu efni. Standi félagsmaður í skuld við félagið í 6 mánuði eða meira og geti ekki sýnt fram á að félagsgjöld hafi verið dregin af launum hans, eða greiðslu til félagsins missir hann réttindi sín þar til hann hefur samið um skuld sína við félagið.

24. grein.

Stjórninni er heimilt að velja heiðursfélaga úr hópi félagsmanna sem hafa unnið félaginu sérstakt gagn, með miklu og fórnfúsu starfi, eða með öðrum verðleikum.

Heiðursfélagar skulu aldrei vera fleiri en fjórir hverju sinni. Þeim skal afhenda heiðursskjál og eða heiðursmerki eftir nánari ákvörðun með reglugerð.

Heiðursfélagar eru undanþegnir gjaldskyldu en halda öllum félagsréttindum. Félagssjóður greiðir gjöld af þeim til STF eins og öðrum félagsmönnum sem eru undanþegnir gjaldskyldu.

25. grein.

Tillaga um samruna eða samvinnu félagsins við annað eða önnur félög eða slit á slíku samstarfi þarf sömu meðferð og lagabreytingar.

26. grein.

Ekki er hægt að leysa félagið upp eða leggja starfsemi þess niður ef átta félagar eða fleiri óska eftir að halda starfsemi þess áfram. Verði félagið hinsvegar lagt niður og starfsemi þess hætt, skal afhenda STF allar eignir félagsins til varðveislu.

Verði félagið ekki endurreist, sameinað öðru stjórnendafélagi, eða nýtt stjórnendafélag stofnað á félagssvæðinu innan fimm ára renna eignir þess alfarið til STF samkvæmt lögum þessum.

VI. kafli. Ágreiningur.

27. grein

Komi upp ágreiningur innan félagsins um túlkun á lögum þessum er heimilt að leita lögfræðilegs úrskurðar STF um málið.

Ekki má breyta lögum þessum, úr þeim fella ,né við þau auka nema á löglegum aðalfundi félagsins.

Þannig samþykkt á aðalfundi BERGs, félags stjórnenda dd.mán 2018